

■ TRIBUNA POLITICA

Collavuraziun transcunfinala en il territori alpin

DA CHRISTIAN RATHGEB*

L'impurtanza e la necessitad da la collavuraziun transcunfinala sa lascha declerar bain cun in citat da l'American Henry Ford: «S'unir è in cumenzament, restar ensemen è in progress, collavurar è in success.» Dapi bunamain in mez onn hai jau surpiglià la represchentanza da la regenza grischuna en la cuminanza da lavur da las regiuns alpinas (Arge Alp). Dapi quasi 50 onns sa radunan diesch pajais, provinzas, regiuns e chantuns da l'Austria, da la Germania, da l'Italia e da la Svizra en la Arge Alp cun la finamira da prender per mauns cuminaivlamain las sfidas da las regiuns alpinas e da collavurar en chaussa.

A chaschun da la conferenza da quest onn a Toblach en il Pustertal dal Tirol dal sid èn ils schefs da las regenzas dals diesch stadis commembers sa fattschentads cun plirs temas ch'èn impurtants per la populaziun dal territori alpin. In da quests temas è stà il svilup dal territori rural. Sco resultat da l'occupaziun intensiva han las regiuns alpinas pronunzià tschintg tesas. Quellas han la finamira da garantir e da sviluppar il territori rural



sco spazi da viver, da lavur, economic, cultural, da recreaziun e sco territori natural d'alta qualitad.

En connex cun il tema «lavur» duain furmas da lavur flexiblas daventar normalas. Latiers tutga per exempel il nov model da lavur smart-working che profita da novas tecnologias e ch'augmenta uschia l'autonomia e la libertad da las lavurantas e dals lavurants. Las administraziuns publicas surpiglian qua ina funcziun d'exempel, ed in attatg a bindel lad en tut las regiuns alpinas è la premissa fundamentala per quai. Las regiuns alpinas vulan ultra da quai rinforzar ils ciclus economics regionalis, la valorisaziun per ils manaschis e la capacitad da cumpra dal territori rural sco er las interpresas pitschnas e mesaunas. Plinavant chapeschan ellas la fermezza dal

territori rural en la coesiun da la populaziun. Pervia da quai vulan ils commembers da la Arge Alp promover sistematicamain ina planisaziun strategica a lunga vista per revitalisar ils centers dals vitgs sco er onurar la lavur voluntara. Ultra da quai duai il maun public garantir l'accessibilitad adequata e senza barrieras al territori rural. Servetschs da mobilitad moderns e multimodals resguarda el en quest regard sco gist uschè impurtants sco ina mobilitad ecologica. En la resoluziun vegn la finala tematisada la qualitad da viver, tranter auter grazia a vias curtas per tut las generaziuns al servetsch public, a la tgira d'uffants, a la furmaziun ed a las purschidas culturalas.

Gist en il Grischun sco chantun muntagnard cun sias passa 150 vals e cun ses 937 pizs è la pro-moziun dal svilup dal territori rural d'in'impurtanza centrala. Per pussibilitar in svilup a lunga vista dal territori da muntogna beneventa il chantun Grischun explicitamain las tesas formuladas e las mesiras pretendidas en la resoluziun davart il territori rural.

* Cusseglier guvernativ, schef dal departament da finanzas e vischnancas.